

IGELA PASEATZERA ATERA DA

Jon Miranderi

Igela paseatzera atera da,
 triste dago ilargirik gabe eta horregatik
 urmahela utziz, ur ezagunak eta
 lurrin berde ezagunak utziz,
 igel papartsua paseatzera atera da
 izarren uzta jasotzera gauak maindire beltzak tolesterako.
 Ez dakusa igelak ilargirik baina halere
 paseatzera atera da igel baldarra;
 bi izar hori, nimino ikusten ditu bakarrik horizonte
 bihurrian
 bi ipurtargi paralelo datoz beragana
 bi kandela borobil
 barandilak herdoilduta daude parajeotan, kontuz ibili igela
 —esan zion behin bere amak— baina halere
 paseatzera atera da begi handidun igela, igel barregarria
 igel saltari pottoloa, igel pailazoa
 igelak bi izar parelelo hori haiek gerturatzen ari direla
 soma dezake
 eta ez direla nimino
 eta ez direla kandela borobil
 bi eguzki itsutzaille direla soma dezake
 eta igelari bururatzen zaio,
 “arraioa, izan dizkik bikiak laranjondoak”
 eta paseatzera atera den igel inozoari burukomina datorkio
 eta ez du jada besterik pentsatzeko astirik

honela itzultzen dizkigu egunsentiaren grisaiak
 gauak akabatutako printze klandestinoak
 autopista asfaltatu berrietako bazterretan

ARROKA BATEAN IDATZIREN DUT ZURE POEMA

Isladaren islada
aspaldi desagertu leihoetan;
ilargirik ez dago jada
geroaren ispilu borobiletan.

arroka batean idatziren dut zure poema
nire etsipena loaraziko duen sehaska kanta bailitzan
kaioek amodio arrainak trenkatu
eta olatuek nire hitzak eternalki mihazkatu ditzaten
horrela beti entzunen da amodioaren oihartzuna
hiriko beiradura gris kolorekoetan,
arroka batean idatziren dut zure poema
eta horrela iraunen du, maite dugunak iraunen duelako
zerua izarniatzen ari da eta ilargia ere nire sahatsetan
endredatu da
dena mortu den une ixil eta borobilean
harpa hariekin josi dute iluntasuna.
Loreleiren orrazeaz erein eta goldeturiko tristura
neure dut izendatzen, neure,
goibeldu da
ene arima biluzia —mao petaloea—
ihartu dira
ene ezpainak ere
fruiturik dastatu gabe apenas
ilargia eta ni gaude bakarrik
tinu arrez jantziriko mihise beltzean
—kristal hautsiaren zantzu urrinak—
urdin zertzelada bakanak dira
arestiko izar
orain amatatuak.